



**KEMENTERIAN PEMBANGUNAN WANITA,  
KELUARGA DAN MASYARAKAT**



**NEGARAKU**

**#NEGARAKU\_KasihKITA\_KPWKM**

**TEKS UCAPAN**

**YB DATO' SRI ROHANI ABDUL KARIM**

**MENTERI PEMBANGUNAN WANITA,**

**KELUARGA DAN MASYARAKAT**

**MAJLIS BERBUKA PUASA**

**14 RAMADAN 1438 HIJRAH**

**9 JUN 2017 (JUMAAT)**

**DEWAN HIKMAH, KUCHING, SARAWAK**

Bismillahirrahmanirrahim.

## **[SALUTASI]**

### MUKADIMAH

Assalamualaikum, Salam Ramadhan dan Salam Negaraku,  
YBhg. Tan Sri/Dato' Sri/Datuk/Ketua-ketua jabatan/tuan/puan, hadirin  
hadirat yang saya hormati sekalian,

1. Alhamdulillah, segala pujian dan syukur saya rafak ke hadrat Allah S.W.T yang telah menganugerahi kita bulan Ramadhan AlMubarak, bulan yang penuh keberkatan dan gandaan pahala melebihi seribu bulan. Selawat dan salam ke atas junjungan besar Nabi Muhammad S.A.W dan keluarga serta para sahabat Baginda yang mulia.
2. Pertamanya, marilah kita bersyukur ke hadrat Ilahi kerana dengan limpah dan rahmat-Nya, diizinkan kita berhimpun pada hari ini untuk sama-sama memeriahkan Majlis Berbuka Puasa Ihya' Ramadhan KPWKM 1438 Hijrah. Saya mengambil kesempatan ini untuk mengucapkan selamat datang dan mengalu-alukan kehadiran Tuan Yang Terutama Yang Dipertua Negeri Sarawak Tun Pehin Sri Haji Abdul Taib Mahmud ke majlis yang dianjurkan oleh Kementerian Pembangunan Wanita, Keluarga dan Masyarakat. Tidak dilupakan kehadiran kumpulan-kumpulan sasar Kementerian yang diraikan serta hadirin sekalian.

3. Hari ini merupakan hari keempat belas kita menunaikan ibadah puasa. Dengan itu, saya mengambil kesempatan untuk mengucapkan selamat meneruskan ibadah puasa dengan azam dan tekad untuk menjadikannya yang terbaik mungkin. Diharap kita semua dapat meningkatkan lagi amalan pada malam-malam Ramadan ini. Saya mendoakan agar kita semua dianugerahkan kesihatan dan kesejahteraan diri untuk menjalani ibadah ini hingga ke akhirnya. Sesungguhnya bulan Ramadan banyak memberi keinsafan dan melatih kita untuk menjadi insan yang lebih prihatin dan bertimbang rasa. Rasa lapar dan dahaga dalam menjalani ibadah puasa membolehkan kita merasai pengalaman yang dilalui oleh golongan yang kurang bernasib baik.
  
4. Majlis Berbuka Puasa merupakan program tahunan KPWKM yang bertujuan merapatkan ukhwah, mewujudkan semangat “kekeluargaan” dalam kalangan rakan strategik serta kumpulan sasar KPWKM.
  
5. Memang tidak dinafikan rakyat Malaysia adalah amat pemurah (*generous*) dan sentiasa bersedia untuk membantu orang yang daif dan kurang bernasib baik dengan menghulurkan derma dan sumbangan kewangan dan barangan. Malah KPWKM telah pun melaksanakan MyCorporate Care sebagai saluran atas talian untuk mendapat derma dan sumbangan daripada badan korporat dan individu.
  
6. Sehubungan itu, rakyat Malaysia yang prihatin adalah digalakkan untuk bersama-sama menyokong usaha yang dijalankan oleh kerajaan dalam membantu mereka yang kurang bernasib baik.

7. Jabatan Kebajikan Masyarakat (JKM) merupakan salah sebuah agensi yang terpenting bagi Kementerian Pembangunan Wanita, Keluarga dan Masyarakat. JKM bertanggungjawab mewujudkan masyarakat berbudaya penyayang dan meningkatkan kesejahteraan masyarakat melalui perkhidmatan kebajikan dan pembangunan sosial yang profesional dan perkongsian tanggungjawab yang strategik.
8. Bagi memastikan Jabatan kekal relevan dan berupaya meningkatkan daya saing, perubahan persekitaran yang berlaku harus ditangani dengan bijaksana supaya terangkum dan sepunya dalam semua program dan yang dikendalikan di samping mampu menyokong kepada agenda Transformasi Negara.
9. Saya sentiasa mengingatkan agar kakitangan JKM haruslah peka dan sentiasa bersiap sedia untuk mengharungi segala cabaran ini dengan memahami peranan, tugas dan tanggungjawab petugas kebajikan seterusnya berasa selesa dengan kerjaya tersebut sebagai satu kepuasan dalam kehidupan.
10. Untuk makluman, bagi Negeri Sarawak, Kerajaan Persekutuan telah memperuntukkan lebih dari RM150juta setahun bagi lebih 50 ribu kes penerima bantuan seperti Bantuan Orang Tua, Elaun Pekerja Cacat, Elaun Pesakit Telantar dan Bantuan Am. Jumlah tersebut menunjukkan keprihatinan kerajaan dalam mendalam menjaga kebajikan dan kesejahteraan golongan yang memerlukan di Negeri Sarawak.

11. Saya tidak bercadang mengambil masa yang lama untuk berucap pada malam ini. Justeru itu, sekali lagi saya ingin mengucapkan ribuan terima kasih kepada semua pihak yang sudi meluangkan masa untuk turut sama memeriahkan majlis pada petang ini dan tahniah juga diucapkan kepada semua pihak yang bertungkus-lumus untuk menjayakan Majlis Berbuka Puasa Ihya' Ramadhan KPWKM 1438 Hijrah.

12. Saya mengambil kesempatan juga untuk mengucapkan selamat meneruskan ibadah puasa dan selamat menyambut Hari Raya Aidilfitri yang akan menjelang tidak lama lagi. Moga-moga perginya Ramadan dan kehadiran Aidilfitri tahun ini memberi sesuatu yang bermakna dalam kehidupan kita InsyaAllah.

Akhir kata, semoga majlis yang diadakan pada hari ini mendapat sinar rahmat dan keberkatan dari-Nya.

Sekian, terima kasih.